

Incko: Pitanje za
Ketrin EštonKacin: Različite
pozicijeBasiner: Važna
uloga Njemačke

Mijenja li Unija politiku prema regionu i BiH

Potrebni izaslanici i EU i SAD za Balkan

Incko pozdravlja sve što doprinosi napretku BiH • Kacin traži i akciju Vašingtona • Basiner se nada snažnoj ličnosti

Pozdravio bih svaku inicijativu koja bi doprinijela napretku Bosne i Hercegovine i regiona ka Evropskoj uniji, izjavio je jučer za „Dnevni avaz“ Valentin Incko (Inzko), visoki predstavnik, komentirajući stav svog prethodnika Pedija Ešdauna (Paddy Ashdown) i novog ministra vanjskih poslova Velike Britanije Vilijama Haga (William Hague) da Evropska unija treba imenovati specijalnog izaslanika za Balkan.

No, Incko, kako nam je rekao, smatra da je to više pitanje za specijalnu predstavnicu EU za vanjske poslove i sigurnost Ketrin Ešton (Catherine Ashton).

Posebne delegacije

Istovremeno, zastupnik u Parlamentu EU Jelko Kacin ističe kako bi mogao poduprijeti Ešdaunov stav i inicijativu, ali pod uvjetom da se na sličan korak odluče i Sjedinjene Američke Države.

- Države na zapadnom Balkanu su u različitim pozicijama. One koje su kandidati za EU imaju posebne delegacije Unije, a ja već odavno govorim da bi Vašington trebao imati posebnog izaslanika u prvom redu za države koje trebaju pažnju, BiH, Kosovo, ali i Makedonija i Srbija - kaže Kacin.

Politički analitičar iz Centra za

demokratizaciju Kurt Basiner (Bassuener), komentirajući mogućnost da EU imenuje specijalnog predstavnika, kaže da nije riječ o novoj ideji.

Uloga Turske

- Najteže bi, ustvari, bilo naći zajedničku politiku koju bi taj specijalni izaslanik provodio. Ona neće doći iz Brisela, već mora doći iz država članica EU. Tu su ključne Velika Britanija i Njemačka. Ako te dvije države usaglase stavove, moglo bi doći do pozitivne promjene - kaže Basiner.

On je, također, stava da bi specijalni predstavnik EU trebao biti u paru sa specijalnim predstavnikom SAD, a uz šefa turske diplomatije Ahmeta Davutolu (Davutoglu), koji je već često pristupao, to bi moglo donijeti značajnu političku promjenu.

Basiner sve povezuje s izborom nove britanske vlade i dolaskom Dejvida Kameron (David Cameron) za premijera.

- To je najbolji mogući ishod izbora za BiH i moglo bi djelovati kao katalizator promjene politike prema BiH. Ako bi još specijalni izaslanik bio snažna ličnost, onda bi to bio značajan pomak - kaže Basiner. **T. LAZOVIĆ**

Korištenje vode iz akumulacije Buško jezero

Čolak: HEP nezakonito zaraduje 70 miliona KM

Korištenjem vode iz akumulacije Buško jezero na području Livanjskog kantona, „Hrvatska elektroprivreda“ (HEP) proizvodi ogromne količine električne energije, što joj omogućava nezakonito ostvarenje čiste dobiti od minimalno 70 miliona maraka godišnje, izjavio je zastupnik HSS-NHI-ja u Parlamentu FBiH Ante Čolak novinarima u Livnu, prenijela je Srna.

Čolak: Mizerna
naknada

Prema njegovim riječima, HEP za korištenje najveće vještačke hidroakumulacije u Evropi općinama Livno i Tomislavgrad plaća mizernu naknadu koja za obje općine iznosi oko dva miliona maraka godišnje, a Hrvatska, kako je rekao, sve eventualne gubitke u nedavno aktueliziranoj „strujnoj aferi“ nadoknađuje na Buškom jezeru.

RAJLOVAC Delegacija Stejt departmenta u kasarni „Orao“

BiH počela uništavati višak oružja i municije

Masijelo podržao aktivnosti BiH na putu ka NATO-u

Prelaskom tenkom preko 30 vojnih pušaka, isto toliko kalašnjikova i 25 komada lakog naoružanja iz akcije „Žetva“ u kasarni „Orao“ u Rajlovcu jučer je ozvaničena nova faza uništavanja nesigurne municije i lakog naoružanja koje je Predsjedništvo BiH identificiralo kao višak.

Simboličnom početku uništavanja tog i oružja prikupljenog u akciji „Žetva“, u društvu visokih vojnih dužnosnika u našoj zemlji, prisustvovala je i delegacija Stejt departmenta, predvođena zamjenikom pomoćnika državnog sekretara SAD za planove, programe i operacije Tomasom Masijelom (Thomas J. Masiello).

Tom prilikom su Masijelo i bh. ministar odbrane Selmo Cikotić po-



Rajlovac: Korak ka NATO-u, korak ka državnoj sigurnosti

(Foto: F. Fočo)

Prisustvo zvaničnika

Uništavanju oružja i municije prisustvovali su i ambasador SAD u BiH Čarls Ingliš (Charles English), predstavnik Zajedničke komisije za odbranu i sigurnost Parlamenta BiH, komandant NATO štaba u BiH Džon Bulard (John W. Bullard), komandant EUFOR-a Bernhard Bair i predstavnici OSCE-a, UNDP-a i Ureda visokog predstavnika.

tpisali i izjavu o zajedničkoj opredijeljenosti za rješavanje viškova lakog naoružanja i neispravne municije.

- Rješavanje viška naoružanja predstavlja ne samo korak ka regionalnoj saradnji, već i ka državnoj sigurnosti. Sjedinjene Države su opredijeljene da daju podršku nastojanjima BiH da na pravi način vodi proces demilitarizacije. Sasvim je razumljivo da to predstavlja ključnu komponentu u promoviranju i napredovanju BiH ka članstvu u NATO-u - ocijenio je Masijelo.

On je naveo da su SAD tu da pomognu BiH pri provođenju plana uništenja desetina hiljada viškova

nesigurne municije i lakog naoružanja. Zaključio je i da su SAD opredijeljene da ostanu partner BiH sve dok ne bude uništen i zadnji komad oružja, ali i zadnji metak.

Ukazujući osim ekonomskih i socijalnih i na problem ogromnog viška naoružanja i municije u BiH, Cikotić je potvrdio da ovaj proces treba dobiti novi zamah i biti nastavljen većim intenzitetom.

- Ovim BiH ispunjava preuzete međunarodne i obaveze koje proističu iz članstva u MAP-u. Time sebi trasiramo brži put prema evroatlantskim strukturama - istakao je Cikotić. **S. R.**

Serž Bramerc potvrdio u Beogradu

Zatraženo proširenje optužnice protiv Mladića

Na osnovu podataka koje sam dobio, nemam razloga da vjerujem da se Mladić nalazi van Srbije, kazao glavni haški tužilac

Glavni tužilac Haškog tribunala Serž Bramerc (Serge Bramertz) izjavio je jučer u Beogradu da je to tužilaštvo zatražilo proširenje optužnice protiv Ratka Mladića za genocid i zločine protiv čovječnosti nad nesrbima tokom rata u BiH, javio je Tanjug.

Riječ je o izmjenama i dopunama koje su utvrđene na osnovu sudske prakse Tribunala, kao i činjenica koje su u proteklom periodu izašle na vidjelo, saopćio je Bramerc novinarima u Specijalnom sudu za ratne zločine.

- Riječ je o zahtjevu koji sadrži 11 tačaka koje se odnose na geno-

cid, ratne zločine i zločine protiv čovječnosti, a konkretno se misli na etničko čišćenje u BiH, genocid u Srebrenici, opsadu Sarajeva i uzimanje pripadnika UN-a za taoce - rekao je Bramerc drugog dana posete Beogradu.

Dodao je da, na osnovu podataka koje je dobio, nema razloga da vjeruje da se Mladić nalazi van Srbije.

Bramerc je jučer u sjedištu Bezbjednosno-informativne agencije odmah razgovarao sa članovima Akcionog tima za lociranje i hapšenje haških optuženika Ratka Mladića i Gorana Hadžića. Glavni



Bramerc: Novi detalji o zločinima

haški tužilac rekao je da se susreo s predsjednikom Nacionalnog savjeta za saradnju s Tribunalom Rasimom Ljajićem, specijalnim tužiocem Vladimirom Vukčevićem i premijerom Mirkom Cvetkovićem.

Cilj je bio uklanjanje Bošnjaka i Hrvata

Prema prijedlogu izmijenjene optužnice, Mladić i Karadžić bili su na čelu udruženog zločinačkog poduhvata čiji je cilj bilo trajno uklanjanje Bošnjaka i Hrvata u BiH s teritorija za koje su bosanski Srbi tvrdili da su

njihove. Kako se navodi, Mladić je, radi postizanja tog cilja, djelovao u sprezi s drugima na počinjenju zločina na različitim lokacijama. Prva optužnica protiv Mladića potvrđena je 25. jula 1995. godine.



PORTAL - komentar dana

Na more će manji broj Bosanaca nego ranije

- Nije samo trend smanjenja turističkih odlazaka iz BiH nego iz cijele Evrope. I u nekim bolje stojećim državama EU, kao što su Češka ili Mađarska, turisti masovno otkazuju

ljetovanja, jer je recesioni period i svakako je da je mnoštvo nezaposlenih, a i oni koji rade, nemaju dovoljno visoka primanja. No, ipak najveći problem predstavlja vizna liberalizacija zbog sporih reformi u zemlji. (alfred)